

Endenquimbo, diez de diciembre, 1948, nidaid abitedinoësh matses utsi-utsiec cho-chopanëdash, onquenuec. Adec cho-choquid Naciones Unidas capec.

Choashic onquepanëdash. - Bëdamboec tabadnuna, quequin chuibanuna. Nuqui chuiboed dada uanuna. Nuqui dada uaid daëdpen nacnenshun meniac utsibo abitedishun nuqui chuiboed tantiatsiashe - quepanëdash cho-choquido. Ambi chiaid neid dada uaid nec.

Nidaid Abitedinoësh Cho-choquidon Bëdamboec Tabadte Chiaid

Utsi Chuinuen Naden chuinëdash

Adashic: - Bëdamboec tabadnuna, qesho: Ai, mimbi chiac padec tabadnuna, matses abitedimbo chuinanubi:

Mibi bëdamboec tabashobi cueschitono, quequid nibedtsiash. Cuesnanenquio matses ictsiash. Icsauanquid chushcatsiash. Bëdambocquid bëdamboen ispatsiash - quequin chuipanëdash nidaid abitedinoësh cho-choquidon.

Adashic: - Enden: Bëdamboec tabadnu, qesho: Padi. Cueschitono, quequin icsamenëdaiddi nëbi utsi uanuna. Naden chuinanuna. Mimbi tantiaidi chuita. Utsibon chuisho tantiate bonquin tantiata. Dacuëdenquiocquin nata. Mibi cuestiapimbo iquebi - quequin chuinanuna. Adec matses utsi-utsiquetsëcquiec nuquibi bëdamboec tabadtsiashe - quequin chuipanëdash nidaid abitedinoësh cho-choquidon.

Adashic: - Bëdamboec tabadnuna, quequin neid chiaid isun chuiquid dapan: Ai, bëdamboen chiacpadec tabadnuna, aton matses chiac bëdambo ictsiash. Aid chuiquid dapa caic: Icsambo iqueque. Cuesunechitono, utsibon cac icsambo ictsiash - quequin chuipanëdash nidaid abitedinoësh cho-choquidon.

Adashic: - Nuquibi bëdambo iquec, cananuna - quequin chuipanëdash nidaid abitedinoësh cho-choquidon.

Adashic: - Bëdamboec tabadnuna, quequin chiac bëdambo ictsiash. Matses abitedimbo bëdambo iquec. Dada bëdambo iquec. Chido bëdambo iquec. Bacuëbo bëdambo iquec, quequin chiac bëdambo ictsiash. Padi.

Mimbi chiac padomboen bëdamboen nainda. Cueschitono quequid chieshëmënquid icsambo ictsiash. Adquid nibëdnubi matses abitedi dada uaquin mëquiacac bëdambo ictsiash. Adembidi dauë menebanac bëdambo ictsiash. Adecbidi piasenquio yec bëdamboec tabadac bëdambo ictsiash - quequin chuipanëdash nidaid abitedinoësh cho-choquidon.

Adashic: - Nëmbo cho-choquidotedi aton nidaidën nishun aton matses nuqui chiondaidd chuituidac: Ai, mimbi chiacpadec bëdamboec tabadnuna, quequin chiac bëdambo ictsiash - quequin chuipanëdash nidaid abitedinoësh cho-choquidon.

Adashic: - Nuqui chuiboed matses abitedimbo tantiamiac bëdambo ictsiash - quepanëdash. Aidtedba chuipanëdash.

Nuqui Chuiboed Bëdambo Iquec, Quiash

Nidaid abitedinoësh cho-choquido: - Nuqui chuiboed matses abitedimbo tantiamenuna. Tantiamiac chuiquid dapabon: Ai, adec bëdamboec tabadcuenuna, cac bëdambo ictsiash. Bëdamboec tabadcuenuna, cacpadec matses abitedi bëdamboec

tabadac bēdambo ictsiash - quequin chuipanēdash nidaid abitedinoësh cho-choquidon.

Chiaid 1

Chidon tishaido yec matses abitedimbo bēdamboec isnanac bēdambo ictsiash. Chieshnanac icsambo ictsiash. Abitedimbo bēdamboec tabadac bēdambo ictsiash. Shubu abentsēcquidēn tabadac birnboec abitedi tabadac bēdambo ictsiash - quequin chuipanēdash nidaid abitedinoësh cho-choquidon.

Chiaid 2.

Nēid dada uaid isash abitedi bēdamboec isnanac bēdambo ictsiash. Ēbi padquid con matsesuidtsēqui bēdambo iquec. Matses utsibo icsarnbo iquec, quenquio yec: Con matses bēdambo icnuc utsibotsen bēdambo iquec, cac bēdambo ictsiash. Adernbidi: Embentsēqui bēdamboen tantiembi. Utsibo abitedishun icsamboen tantiec, quenquioēquin:

Chieshēenquiocquin ma ambi tantiaidi napanu cac bēdambo ictsiash. Chidobi bēdamboen istiapimbo iquebi, quenquiocquin chidotsen bēdamboen isac bēdambo ictsiash. Chuiquid dapambi nēid chiaid niacbidanquin aton matses chieshēnac icsambo ictsiash - quequin chuipanēdash nidaid abitedinoësh cho-choquidon.

Chiaid 3.

Matses utsibo yuainquio yec, cuesnanenquio yec quec bēdamboec tabadnuna, cac bēdambo ictsiash - quequin chuipanēdash nidaid abitedinoësh cho-choquidon.

Chiaid 4.

Matses utsibo min matsesbēta yuainquiocquid. Yuac icsambo ictsiash. Adembidi matses utsibo min matsesbēta beshun yuamequin menenquiocquid. Yuamenun meniac icsambo ictsiash - quequin chuipanēdash nidaid abitedinoësh cho-choquidon.

Chiaid 5.

Matsespenquio yachimboecnuc aton matses bēta matses utsibo icsauainquiocquid. Icsauac icsambo ictsiash - quequin chuipanēdash nidaid abitedinoësh cho-choquidon.

Chiaid 6.

Atoda nidaidēn nidacsho anocquidon: Con matses chuiquid dapan chiaid ley caid nata. Niacbidansho juez caidēn ēbi yac padomboembidi cuidtsiash, cac bēdambo ictsiash - quequin chuipanēdash nidaid abitedinoësh cho-choquidon.

Chiaid 7.

??Mitsicquid nidaidēn tabadquid nec? Aton nidaidēn tabadquido chuiquid dapan chiaid ley caid abitedishun nac bēdambo ictsiash. Aidēn chiaid niacbidansho juez caidēn cuidac bēdambo ictsiash. Nēid chiaid niacbidanquin matses utsi caic: Matsespenquio mibi nec. Mibi bēdamboen istiapimbo iquebique. Mēyanu, quequin ambembi nac icsambo ictsiash. Cuidte chuiquid juez caidēn matses abitedimbo: Mibi matses nec. Con matses nacpadomboembidi mibi naimbi, cac bēdambo ictsiash - quequin chuipanēdash nidaid abitedinoësh cho-choquidon.

Chiaid 8.

??Midacquid matses nepec? Aton nidaidën tabadquido chuiquid dapabon chiaid nac bēdambo ictsiash. Aid chiaid niacbidanquin utsibo icsauasho isun juez caidën bemeshun cuidac bēdambo ictsiash - quequin chuipanēdash nidaid abitedinoësh cho-choquidon.

Chiaid 9.

Nēid chiaid niacbidanquin ambembi matses quëne uac icsambo ictsiash. Adembidi ambembi chieshënquin matses aton nidaidënshun cuemiac icsambo ictsiash - quequin chuipanēdash nidaid abitedinoësh cho-choquidon.

Chiaid 10.

Chuiquid dapabon chiaid ley caid niacbidanosh. Icsaosh, caid beshun juez caid yacno buanquin. Anoshombi matses daēdpenshun isnuc juez caidën chieshēnenquiocquin chuimequin. ??Atotsi nao? quequin chuimequin. Ashumbi aid isquidtsen chuimequin. Adoshombic: Abimbo caosh. Icsaosh, qeshun cuidquin. Icsabicshobi: Icsabi iqueque. Cuidtiapimbo iquebi. Ma nidnu, cac bēdambo ictsiash. Cuidte chuiquid juez caidën chieshēnenquiocquin abimbo cac bēdambo ictsiash - quequin chuipanēdash nidaid abitedinoësh cho-choquidon.

Chiaid 11.

Chuiquid dapabon chiaid ley caid niacbidanosh. Icsaosh, caid beshun cuidte chuiquid juez caidën uesquin chuimiabi badedi: Mibi icsaque. Mibi cuidnu, cac icsambo ictsiash. Chata. Utsibon tantianubi chuimiabi icquin: Icsambo iquec, catiapimbo iquebi. Chuimebono, juezën cac bēdambo ictsiash.

Chuiquid dapabon chiaid ley caid niacbidanacsho juez caidën chuimeshun cuidac bēdambo ictsiash. Chuiquid dapabon: Aden naic icsambo ictsiash. Adoquid naden cuidquid, quequin chiacmaid nacsho: Icsambo iqueque. Cuidnu, cac icsambo ictsiash. Aidon chiaid niacabicsho cuidac icsambo ictsiash - quequin chuipanēdash nidaid abitedinoësh cho-choquidon.

Chiaid 12.

Nidaid utsin-utsinquetsēcquiecquidën chuiquid dapabon: Nadquid icsambo iqueque. Cuidnu cac bēdambo ictsiash. Nēidic: Mimbi tantiaidi nainda. Embi chiac padomboenuidtsēqui nata, quec chieshēmēnquid. Nēidic: Min nabobēdi bēdamboec tabadenda, quec chieshanquiecquid. Nēidic: Ambi tantiaidën iste dada uaid isnushe. Beshun secanuna, quequin dada uaido beshumēnquid. Aided icsambo iquec, quequin chuiquid dapabon chiac bēdambo ictsiash - quequin chuipanēdashe nidaid abitedinoësh cho-choquidon.

Chiaid 13.

Nidaid utsin-utsinquetsēcquiecquidën chuiquid dapabon nadoac bēdambo ictsiash. Nēid nidaidën tabadquid: Capucuenenu, qesho tantiaishun: Ai, capucueneta, cac bēdambo ictsiash. Adembidi: Shubu utsin manēdnu, qesho: Ai manēdta, cac bēdambo ictsiash, quequin chiac bēdambo ictsiash.

Nadembidi chiac bēdambo ictsiash. Nēid nidaidēnoësh nidendabi, qesho, Ai, nidta, cac bēdambo ictsiash. Nidenda. Cueschitono, shēpi, cac icsambo ictsiash. Padnuen: Nēid nidaidën choaindabi, qesho, Ai, chota, cac bēdambo ictsiash. Padnuen: Choenda. Cueschitono, cac icsambo ictsiash - quequin chuipanēdash nidaid abitedinoësh cho-choquidon.

Chiaid 14.

Nidaid utsino cuenash: Con nidaidën tabadquidën ambembi chiesënac cuenobique. Min nidaidën tabadnu, qesho: Ai, nëmbobi quenenta, cac bëdambo ictsiash.

Padnuen aton matses chuiquid dapabon ley chiaid niacbidanec: Cuidnushe, quianec nidaid utsin cuensho: Ai, nëmbo quenenta, cac icsambo ictsiash. Adembidi ëmbi chuiboed niacbidanec: Cuidnushe, quianec nidaid utsin cuensho: Ai, nëmbo quenenta, cac icsambo ictsiash - quequin chuipanëdash nidaid abitedinoësh cho-choquidon.

Chiaid 15.

Acte amë ëquë cuëma utsiuc tabadquid: Peruano nebi, qesho Peru yacnocquid ëhuiquid dapan: Ai, Peruano mibi nec, cac bëdambo ictsiash. Padnuen acte amë oquë cuëma utsiucquid: Brasileiro nebi, qesho Brasil yacnocquid chuiquid dapan: Ai, Brasileiro mibi nec, cac bëdambo ictsiash. Padnuen nidaid utsin tabadquid: Nëid nidaidën icquidquio nebi, qesho: Ai, adquid mibi nec, cac bëdambo ictsiash.

Aton nidaidën tabadquid: Nëid nidaidën icquid mibi catiapimbo iquebi. Con matses mibi cainqujo iquembi, ambembi cac icsambo ictsiash. Padnuen aton nidaidën tabadquid: Nëid nidaidën icquid icboedi nëbi nidaid utsin manëdash aid nidaidën icquid yanebi, qesho ambembi chieshënquin: Padi. Aid nidaidën icquid mibi catiapimbo iquebi, cac icsambo ictsiash - quequin chuipanëdash nidaid abitedinoësh cho-choquidon.

Chiaid 16.

Ashumbic padpiden: - Dada caniaidi: Con bacuë tishmenuen con matsesën champi bednu, qesho: Ai, adota, cac bëdambo ictsiash. Caniaid utsibi: Con bacuë tishmenuen matses utsin champi bednu, qesho: Ai, adota, cac bëdambo ictsiash. Padnuen chido caniaid: Con bacuë tishnuen con matses bedmenu, qesho: Ai, adota, cac bëdambo ictsiash. Chido canjaid utsibi: Con bacuë tishnuen matses utsibi bedmenu, qesho: Ai, adota, cac bëdambo ictsiash. Dadabi: Con chidobëdi bëdamboec tabadnu, qesho: Ai, adta, cac bëdambo ictsiash. Chidobi: Con bënëbëdi bëdamboec tabadnu, qesho: Ai, adta, cac bëdambo ictsiash. Chido aton bënë yuapenquio nec. Dadabi: Embi con chido caboedi icsasho isun con chidopenquio canu, qesho, Ai, adota, cac bëdambo ictsiash. Chidobi: Embi con bënë caboedën chieshënoshi. Aidi nianu, qesho, Ai, adota, cac bëdambo ictsiash.

Nidaid utsin-utsinquetsëcquiecquidën chuiquid dapabon: Dadabi: Aton bënë ictiapimbo iquebi, qesho bedmenda. Adecbidi chidobi: Aton chido ictiapimbo iquebi, qesho bedmenda. Padnuen dadan: Mibi bednu, cac: Ai, ëbi bed, cac bëdambo ictsiash.

Nidaid utsin-utsinquetsëcquiecquidën chuiquid dapabon: Dada aton nabobëdi bëdamboec tabasho isash: Bëdambo iquec, cac bëdambo ictsiash. Chieshëmënnquidën aton chido beshunac icsambo ictsiash. Adembidi aton bacuëbo beshunac icsambo ictsiash. Adoquid cuidnuna, quequin chiac bëdambo ictsiash - quequin chuipanëdash nidaid abitedinoësh cho-choquidon.

Chiaid 17.

Nidaid utsin-utsinquetsëcquiecquidën chuiquid dapabon: Ampiabiquid: Con nabi nec, qesho: Ai, mitsa na nec, cac bëdambo ictsiash. Adembidi: Utsin nabëdi con na nec, qesho: Ai utsin nabëd mitsa na nec, cac bëdambo ictsiash.

Adashic: Ancanquidën utsin na beshunac icsambo iquec. Adembidi utsin na ampiac icsambo iquec, quequin chiac bëdambo ictiash - quequin chuipanëdash nidaid abitedinoësh cho-choquidon.

Chiaid 18.

Nidaid utsin-utsinquetsëcquiecquidën chuiquid dapabon: Nëmbocquid: Aden tantiambi, qesho: Aden tantiasho mibi cuesunechitono, shëpi, cac icsambo ictsiash. Utsibi: Matses uaquid abentsëqui Nuquin Papa iquec, qesho: Adquid cuesunechitono, shëpi, cac icsambo ictsiash. Utsibi: Nuquin Papa caid nibëdec, qesho: Adquid cuesunechitono, shëpi, cac icsambo ictsiash. Utsibi: Podobitsi daëdpen tantiaquidquo nebi, qesho: Adquid cuesunechitono, shëpi, cac icsambo ictsiash. Padnuen: Podobitsi daëdpen tantiaquid icboedëmbi nëbi utsi uaimbi. Nëbi Nuquin Papa tantiaquid nebi, qesho: Adquid cuesunechitono, shëpi, cac icsambo ictsiash. Utsibi: Embi Nuquin Papa caid tantianuec shubun puduedash tabadcuedednu, qesho: Padi, cuesun secachitono, cac icsambo ictsiash. Utsibi: Embi Nuquin Papa caid tantianuec abentsëqui tsadnu, qesho: Padi. Cuesunechitono, cac icsambo ictsiash. Padnuen: Embi Nuquin Papa caid utsibo chuibanu, qesho: Asho mibi cuesunechitono, cac icsambo ictsiash. Utsibi: Embi Nuquin Papa caid tantianuen nanu, qesho: shëpi cac icsambo ictsiash, quequin chiac bëdambo ictsiash - quequin chuipanëdash nidaid abitedinoësh cho-choquidon.

Chiaid 19.

Nidaid utsinutsinquetsëcquiecquidën chuiquid dapabon: Matsesën ambibi tantiaid chuisho: Chuisho cueschitono, shëpi. Chën, cac icsambo ictsiash. Utsibi: Utsin chuisho tantiatanu, qesho: Nisho isun mibi cuesunechitono, shëpi. Chën, cac icsambo ictsiash. Padnuen: Maquinian onquequin utsibo chuibanu, qesho: Chën. Cuidchitono, cac icsambo ictsiash. Utsibon iste dada uanu, qesho: Chën. Dada uainda, cac icsambo ictsiash. Nidaid utsin tabadquid chuinu, qesho: Chën. Anocquido chienda, cac icsambo ictsiash, quequin chiac bëdambo ictsiash - quequin chuipanëdash nidaid abitedinoësh cho-choquidon.

Chiaid 20

Nidaid utsin-utsinquetsëcquiecquidën chuiquid dapabon: Con nidaidën tabadquid: Aidobëdi bëdamboec tabadnu, qesho: Ai, adta, cac bëdambo ictsiash. Adembidi: Shubun tsaduedash bëdamboec onquecuedednu, qesho: Chën. Cuidchitono, cac icsambo ictsiash.

Adashic: Utsibi: Aden tantiaquidobëd tabadtiapimbo iquebi, qesho: Baded cho. Choenquiocsho cuidchitono, cac icsambo ictsiash, quequin chiac bëdambo ictsiash, - quequin chuipanëdash nidaid abitedinoësh cho-choquidon.

Chiaid 21.

Nidaid utsin-utsinquetsëcquiecquidën chuiquid dapabon: Miqui chuiquid ictiadquo iquebi, qesho aton matsesën: Ai, ëbi chuiquid icta, casho utsibo daëdpatsëcshun: Padi, cuesunechitono, shëpi, cac icsambo ictsiash. Padnuen: Miqui chuiquid ictiadquo iquebi, qesho aton matsesën: Padi caqui chieshënquin: Padi, caquido cuesun secachitono cac icsambo ictsiash.

Chuiquid dapabon: Nuquin matses abitedi nashununa. Aton podquedën uauinc, aton dauëchoquid icmequinc, aton dada uaid ismequid icmequinc canuna, cac bëdambo ictsiash.

Matses daëdpenshun: Embi chuiquid icta, cac aidi chuiquid icmiac bēdambo ictsiash Padabi yac icsambo ictsiash. Utsibombi: Aidi chuiquid bēdambo ictsiash, quequin utsibo ismenquiocquin aid cuēmēdquid dada uashun sandoquin. Adoshombi matses abitedishun ambi tantiaid dada uatanquin sandoacsho sandoaid beshun tambanquin. Adoshombic: Mibi cuēmēdquid matses daëdpenshun dada uaque. E'bi chuiquid icta, cain. Padnubi matses utsibon aton matsesēn nac padomboen chuiquid dapa icmequin. Adoac bēdambo ictsiash - quequin chuipanēdash nidaid abitedinoēsh cho-choquidon.

Chiaid 22.

Matses abitedi bēdamboec tabadac bēdambo ictsiash. Piasenquo yec dacuēdenquo yec tabadac bēdambo ictsiash. Nēid nidaidēn icquido chuiquido nidaid utsin icquidobētan chuiquin: Matses utsi-utsiec abitedimbo bēdambo iquec. Aton piucquid bedmenuna. Bēdamboec tabadmenuna. Min matsesi bēdamboen istiapimbo iquebi, cainquo icnuna, cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 23.

Nidaid utsinquetsēcquiecquidēn chuiquid dapabon: Nuquin nidaidēn tabadquido: Chuiquid dapan chiaid ley caid niachidanenquiocquin piucquid bednuen naimbi, qesho: Ai, adota, cac bēdambo ictsiash. Padnuen piucquid bednuen nashunaidon: Chata. Tiboeta. Miqui mēyadeque, abi nashunquido cac bēdambo ictsiash. Chonoaoanquidquo icsambo ictsiash. Utsibi: Piucquid benuen naimbi, cac: Naic cho, caquid nibēdsho isun chuiquid dapan: Nanu, cauidquido piucquid meniac bēdambo ictsiash.

Padnuen: Naic cho, cac daēdpen chonoadacsho piucquid menequin. Chonoadquido abitedishun tauac padquido aidtedishun nainacsho piucquid ated-atedbidi menebaniac bēdambo ictsiash.

Ma aton nabo pemequinc, dasiinquinc, shubu uaquinc canu, quequin chieshenquiocquin chonoadquid piucquid daēdpen meniac bēdambo ictsiash. Piucquid daēdpatsēc meniac aton nabo pistsēc pemequinc, disiinenquiocquinc, shubu uatsēcquinc cac icsambo ictsiash. Adec icsambocsho isun chuiquid dapan: Piucquid menenuna, cac bēdambo ictsiash.

Chonoadquido: Ebi chonoadac padec chonoadquidobēd onquecuedednuna. Ēbi chonoaoaquidon piucquid daēdpatsēc menesho chushcanuna, qesho: Chēn. Onquecuededenda. Cuidchitono, cac icsambo ictsiash. Ai, miqui chiac padota, cac bēdambo ictsiash - quequin chuipanēdash nidaid abi tedinoēsh cho-choquidon.

Chiaid 24.

Tibocamianenquiocquin chonoaoanquiac icsambo ictsiash. Padnuen: Padi. Nēbadiadash tiboenua, cac bēdambo ictsiash. Dia ēeriado caidēn matses abitedi tiboequid. Asho Chonoaoaquidēn dia ēeriado caic: Aid ushēmbi chonoadac bimboecnuc adted piucquid menenu, cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 25.

Aton pete icnuc, aton dashcute icnuc, aton shubu icnuc, aton dauē icnuc aton nabobēdi matses bēdamboec tabadtsiash. Adac bēdambo ictsiash. Utsibi chonoadtiapimbo icquin aton piucquid bedtiapimbo yec bēdamboec tabadtiapimbo iquec. Nēidtedi matses chonoadtiapimbocquido nec. Nēidic Naid cho, cacmaido.

Nëidic dada icsatsaido. Nëidic niantebo. Nëidic tsusiompibo. Nëidic machompibo. Aidedi chonoadtiapimbocsho isun chuiquid dapan aton piucquid meniac bēdambo ictsiash.

Ani aton bacuēbobēd tabadquido bēdamboen isquin bēdamboen dayun uac bēdambo ictsiash. Bēnēn tishmiaido bacuēbo bēdamboen isquinc abembi uaidēn tishaidotsen bēdamboen isquinc cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 26.

Nidaid utsin-utsinquetsēcquiecquidēn chuiquid dapabon: Con matses dada uate shubun puduedash mēquiadnu, qesho: Ai, adta, cac bēdambo ictsiash. Taēyec mēquiadquid dada uate shubun puduedacsho: E'~mbi mibi mēquiacsho ēbi piucquid mene, cac icsambo ictsiash. Yucash mēquiadquidēn mēquiacquid piucquiud meniac bēdambo ictsiash. Bacuēbo abitedi dada uaquin mēquiacnuna, cac bēdambo ictsiash. Dada uaic bēdamboec mēquiadash: Dada uaid daēdpenquo tantiatiaquio iquebi. Dada uate shubu utsin puduednu, qesho: Ai, adta, cac bēdambo ictsiash. Utsibi nacnenec mēquiadash: Nacnenquidēnquo ismesho istanu, qesho: Ai, adota, cac bēdambo ictsiash.

Dada uate shubun puduedshun mēquiacquidon: Matses utsi-utsiquetsēcquiec iquec. Abitedimbo bēdambo iquec. Utsibo abitedi bēdamboen isnuna. Chieshnanenquo yec cuesun secananenquo icnuna. Adec bēdamboec tabadnuna - quequin mēquiadquido bēdamboen chiac bēdambo ictsiash.

Amēbētan anin: Nëid dada uate shubunoshon ~ēquiacquidēn ēmbi tantiaidbidi chioshe. Ambo con bacuēbo yuednu, qesho: Ai mibi chiac padota, cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 27.

Con matses cuēdēnacno istanu, qesho: Ai, mibi chiac padota, cac bēdambo ictsiash. Utsibi: Con matses mamēnacno istanu, qesho: Chēn. Cuidchitono, cac icsambo ictsiash. Utsibi: Con matsesēn nacnenaid istanu, qesho: Ai, adotanta, cac bēdambo ictsiash. Utsibi: Con matsesēn nacnenaid bednu, qesho: Chēn, mibipadquid bedmetiapimbo iquebique, cac icsambo ictsiash.

Dada uaquido nacnenquidobēta bēdamboen isac bēdambo ictsiash. Utsibombi ambi tantiaid dada uaquid. Utsibombi ambi tantiaid nacnenquid. Adoquidon: Embi nacnenaid bednuen ēbi piucquid mene, qesho bedquin piucquid meniac bēdambo ictsiash. Padnuen utsin dada uaidi caic muaquido: Embimbo dada uaid nec, qesho chuiquidēn cuidac bēdambo ictsiash. Muaquid utsibi: Embibo nacnenaid nec, qesho adembidi chuiquidēn cuidac bēdambo ictsiash - quequin chuipanēdash nidaid abitedinoēsh cho-choquidon.

Chiaid 28.

Nidaid abichobi icquidēn tabadquido chieshnanenquo yec bēdamboec tabadac bēdambo ictsiash. Matses aton matses utsibobēdi chieshnanac icsambo ictsiash. - quequin chuipanēdash nidaid abitedinoēsh cho-choquidon.

Chiaid 29.

Nidaid utsin-utsinquetsēcquiecquidēn chuiquid dapabon: Min shubu yacno bēdamboec tabadtiadquio yec bēdamboec nashunanta, cac bēdambo ictsiash.

Chuiquid dapabon aton matses bēdamboec tabadte bonquin chiaid aton matsesēn nac bēdambo ictsiash. Chuiquid dapabon aton matses mēyante bonquin chiaid aton matsesēn niacacsho cuidac icsambo ictsiash.

Embi chuiboed isun: Bēdamboec tabadnuna, cac bēdambo ictsiash. Padnuen ėmbi chuiboed ismeshun: Embi naiduidi nanu, shēpi, cac icsambo ictsiash - quequin chuipanēdash nidaid abitedinoēsh cho-choquidon.

Chiaid 30.

Nēid dada uaid isash, Icsa uanquionona, cac icsambo ictsiash. Padnuen nēid dada uaid isun, Nidaid abichobi icquidēn tabadquidobēdi bēdamboec isnanec bēdamboec tabadnuna, cac bēdambo ictsiash - quequin chuipanēdash nidaid abitedinoēsh cho-choquidon.